



**Cussegl da vischnaunca 06-2013/2016**  
Seduta dils 4 d'october 2013

---

### **Protocol**

dalla seduta dil cussegl da vischnaunca,  
**venderdis, ils 4 d'october 2013**, allas 19<sup>00</sup>- 21<sup>35</sup>uras  
en Claustra, sala Peter Kaiser

---

**Presidi:** Flavio Murer

**Actuar:** Ervin Maissen

**Presents:**

- |                             |  |  |
|-----------------------------|--|--|
| a) Cussegl                  | Christoph Berger<br>Armin Berther<br>Adrian Bigliel<br>Silvio Candinas<br>Edgar Durschei<br>Rita Huonder-Tenner<br>Wendelin Jacomet<br>Jordana Lozza-Desax | Armin Manetsch<br>Flavio Murer<br>Adrian Pally<br>Marco Schmed<br>Alfred Spescha<br>Rico Tuor<br>Livio Zanetti |
| b) Suprastonza<br>communala | Francestg Cajacob<br>Madlen Deflorin-Spescha<br>Iso Mazzetta   | Cecilia Maissen<br>Roger Tuor  |
| c) Canzlist<br>communal     | Andri Hendry   |  |
| d) Hosps                    | 10 persunas  |  |

## Frater Niklaus Schwegler statalter

Dalla derivonza vul la noziun statalter era dir substitut. Substitut, responsabel pils beins terresters dalla Claustra. Frater Niklaus dat ina survesta davart la cuminonza claustrala, la quala festivescha igl onn 2014 1400 onns dapi siu origin. La Claustra da Mustér ei la pli veglia cuminonza benedictina senza interrupziun ch'exista oz en Svizra. Il svilup dalla cuminonza claustrala ei empermettents, adina puspei anflan novs umens la via en claustra.

Per saver menar il menaschi claustral a moda efficienta han ins partiu quel en quater parts. Numnadamein il convent sut l'egida dil decan, la scola cun il rector, ils beins immobiliars cun il statalter ed ina gruppa che sefatschenta cun la problematica da recaltgar ils mieds finansials per las incaricas dalla Claustra.

Ils davos onns ha la Claustra investau mintg'onn varga 2 milliuns francs el manteniment dils baghetgs. En connex cun la sanaziun dalla baselgia claustrala vegn ei ad esser necessari d'augmentar il volumen d'investiziun sin varga 4 milliuns francs ad onn.

La Claustra occupescha actualmeins 89 collaboraturs cun in pensum da 67 plazzas da lavur cumpleinas. La summa annuala da pagas semova entuorn 4.6 milliuns francs.

En connex cul giubileum da 1400 onns vul la Claustra sesarver anoviar. Ina part ei la formaziun dil niev plaz claustral. La secunda part fuorma l'avertura dil zuler che meina naven dalla porta en baselgia per la publicitad cun endrizzar in menaschi da gastronomia pils pelegrins.

Igl onn da giubileum preveda suandonts termins:

- Ils 21 da mars Sogn Benedetg cun l'ordinaziun da pader Joannes Chandon
- Ils 6 da fenadur Sogn Placi
- Ils 24 entochen ils 26 d'october l'EX14 ensemen cun l'Uniun da commerci e professiun.

Entochen igl october 2014 vul la Claustra realisar ina part dall'avertura.

## President dil cussegl da vischnaunca

"En num dil cussegl da vischnaunca da Mustér engraziel jeu grondamein per la presentaziun dalla fiasta 1400 onns claustra da Mustér. Jeu giavischel a tuts cumpigliai bia success e satisfacziun durant quei interessant temp.

Jeu beneventel Vus alla sisavla seduta dalla perioda d'uffeci 2013/2016 cheu en sala Peter Kaiser.

Tut ei en moviment.

„Google maps“ puspei falliu. Quei han ins saviu leger suenter ier en la pressa dil di sil frontispezi. Tgei pomai duei esser falliu vid Aschera, Crusch e Claustra. Tenor mei savess ins era dir „Google maps“ puspei auter. Engraziel fetg Google.

En la medema crena va St. Gotthard. Finito cun San Gottardo.

Ils responsabels da Sedrun Mustér Turissem han denton puspei perschadiu ier sera durant la radunonza generala. Cun il niev partenari sil sector da marketing Grischun vacanzas ei il niev slontsch gia da sentir.

Jeu supplicheschel la suprastanza communal da passar ad uras avon il cussegl cun las midadas giavischadas per ch'il termin da partenza ambizius d'entschatta matg 2014 sappi vegnir contonschius cun nies sistem politic.

Naven digl 1. schaner 2014 vegn la vischnaunca Ilanz/Glion a semiserar cun igl ulteriur spazi da habitar e lavur dalla Surselva. Quei niev construct ord la fusiun d'in tschuppel vischnauncas vegn a necegiar las schanzas ch'il temps porta senza stuer mirar dretg e seniester. Dabia dil vargau peisa buca pli sco ballast frenond e la nova vischnaunca astga pli u meins entscheiver da niev. Nuot auter che sch'ina interpresa fa naufragi ed ils novs patruns untgeschan las decisiuns munglusas da pli baul.

Cun in techet luschezia gratuleschel jeu alla populaziun dalla vischnaunca da Ilanz/Glion ch'els ein semtgai dad ir el futur cun in'organisaziun politica adequata e conforma al temps.

Da l'otra vart havein nus gest saviu endriescher ils davos dis dil squetsch da temps che regia en Surses pertuccont il niev consorzi da scola. Quei squetsch da temps impedescha denton buca da passar il proxim temps avon il pievel e sche tut gartegia lantschar il niev consorzi da scola gia naven digl uost 2014.

Con ditg lein nus aunc discussiunar, frenar, lamentar ni sevilar?

Tgei ch'il resultat dall'iniziativa cantunala en connex cun ovras da cotgla ha per consequenzas vegn il temps a stuer mussar. Quei che croda en egl ei il resultat puspei pez a cup da 50:50 che ha sfurzau da verificar la votaziun. Deplorablamein ha era nosa vischnaunca furniu resultats munglus che han stuiu vegnir curregi marginalmein.

Ina decisiun negativa da nos vischins da Sumvitg sa esser ina sligiazion positiva per nus. Lein sestentar cun tutta forza ch'ei gartegi da recaltgar ils daners che vegnan dil Rein si.

Da l'otra vart sestenta in comité d'iniziativa per la realisaziun d'ina halla plurivalenta en Tujetsch. Senz'auter in postulat giavischeivel.

Lubi a mi denton ina damonda aviarta: Sa contas casas da scola pli u meins novas e vitas ch'ins baghegiass oz buca pli en nies Cantun?

E la finfinala la comunicaziun: La vitrina en la caverna dil tunnel dalla NEAT vegn montada. Gia en paucs onns astgein nus sedecider per ina vart ni l'otra dalla finiastra. Impurtont da saver: ils trens da personas passan cun 70 m/s; quels da vitgira cun 50 m/s. Il sentiment ei quei che vala."

La gliesta da tractandas secloma sco suonda:

19<sup>00</sup> - 20<sup>00</sup> Informaziun entras frater Niklaus davart las festivitads da 1400 onns  
Claustra Mustér

### **Tractandas:**

1. Protocol nr. 5-2013/2016
2. Credit per la sanaziun dil parcadi Claustra  
(messadi nr. 5-2013/2016)
3. Regulativ da fatschentas: Cuntinuaziun (messadi nr. 2-2013/2016)
4. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér  
Il president: Igl actuar:



**Cussegl da vischnaunca 06-2013/2016**

Seduta dils 4 d'october 2013

---

**1. Protocol nr. 5-2013/2016**

President dil cussegl da vischnaunca

Il protocol ei vegnius tarmess tier per posiziun. Enteifer ils 5 dis fixai ei vegniu inoltrau neginas objecziuns.

*Il protocol nr. 5-2013/2016 dalla seduta dils 23 d'uost 2013 vegn approbaus senza midadas.*

Cussegl da vischnaunca Disentis/Mustér  
Il president: Igl actuar:

Flavio Murer

Ervin Maissen



## Cussegl da vischnaunca 06-2013/2016

Seduta dils 4 d'october 2013

### 2. Credit per la sanaziun dil parcadi Claustra (messadi nr. 5-2013/2016)

Suprastonza communal

A basa dil messadi nr. 5-2013/2016 presenta il president communal la fatschenta. La discussiun davart il project da sanaziun pil parcadi Claustra ha caschunau discussiuns emoziunalas. Sin fundament dil resultat dalla votaziun dils 3 da mars 2013 ha la suprastonza communal surluvrau il project e presenta duas variantas. Ina varianta minimala cun la sanaziun dalla cuvrida. La secunda varianta ensiara la cuvrida sco era la sanaziun dil baghetg sanitar ed dil plazzal per la rimnada dils rumians.

#### **Discussiun davart la debatta d'entrada**

Cussegliaer Wendelin Jacomet

Constatescha che la fatschenta vegn presentada pér siat meins suenter ch'in credit per la sanaziun dil parcadi Claustra ei vegnius renvius. A siu manegiar stuess ins avon che tractar quella fatschenta, sebasond sin art. 26, al. 2 dalla constituziun communal, decider da revegnir ad ella. Perquei propona el:

"D'entrar e tractar quella fatschenta, per dar al parlament la pusseivladad da far modificaziuns ni remetter il project alla suprastonza communal. Nus astgein conceder questa sera negins credits per ina sanaziun dil parcadi Claustra. Il messadi cun la damonda per in credit astga buca vegnir exequida avon il meins mars 2014. Tenor mei ei era la suprastonza communal obligada da setener vid quei datum."

Suprastonza communal

La prescripziun digl art. 26 dalla constituziun vala per l'istanza che ha decidiu negativamein davart ina fatschenta. En quei cass sto quell'istanza revegnir cun 2/3 dallas vuschs. Il cussegl da vischnaunca sco era la suprastonza communal che han giu susteniu il project da sanaziun astgan el rom da lur cumpetenzas revegnir da tut temps a lur conclus senza observar il quorum. En quei senn astga il cussegl da vischnaunca decider questa sera tgei varianta che vegn en damonda.

Cussegl da vischnaunca

La decisiun dil pievel ei da prender serius. Il pievel duei buca vegnir provocaus entras ina decisiun dil cussegl a favur dalla sanaziun dil parcadi. Actualmein spetgan pli impurtonts projects da vegnir realisai sco la tractaziun dil program d'activitad, la sanaziun dalla casa da scola, la sanaziun dalla Via Cons. Ins vul buca frenar la suprastonza communal, denton sto ei esser enzatgei niev, in'attracziun, enzatgei grond ch'attila visitaders. In parcadi ei negina attracziun.

Plinavon vegn deplorau ch'ins intervegn ord la pressa davart projects che duein vegnir suttamess al cussegl da vischnaunca e quei per part aunc cun outras cefras che figureschan silsuenter el messadi. El futur duei la suprastonza informar la pressa suenter ch'il cussegl ha retschert las informaziuns.

## **Discussiun da detagl**

*Cunquei ch'ei vegn buca fatg cunterpropostas entra il cussegl da vischnaunca e tracta la fatschenta en detagl.*

### Cussegl da vischnaunca

Tenor las indicaziuns el messadi per la votaziun dils 3 da mars 2013 eran ins partius d'ina surfatscha da 1'150 m<sup>2</sup> cun ina summa da frs. 120'000.--. El messadi actual partan ins d'ina surfatscha 1'250 m<sup>2</sup> denton d'ina summa da frs. 105'000.--. Daco quella differenza?

Pertgei ein las lavurs digl impressari dalla varianta dus cun frs. 84'000.-- aschi aultas? Nus discurren sulettamein d'ina sanaziun dil baghetg sanitar e dil plazzal per rimnar ils rumians! Il cantun ha pretendiu ch'ils autos vegnien parcai da niev viers la via cantunala (protocol cussegl da vischnaunca dils 24 d'uost 2012). Las lavurs dalla part encunter la via cantunala, ca. 1/3 dil parcadi, inclus igl access ein gia terminadas. Dalla vart dalla segirtad, leu ha ei dau neginas midadas. Eis ei denton da spitgar midadas tier igl access? Ins ponderescha d'endrizzar in tancadi per automobils electric. Fuss ei previu da bloccar in parcadi mo per quei intent?

### Suprastonza communal

Ins sebasa tier la varianta minimala d'ina surfatscha catramada da 1'150 m<sup>2</sup>. Tier la surfatscha da 1'250 m<sup>2</sup> setracta ei d'in sbagli da scriver. Il project staus suttamess ils 3 da mars 2013 prevedeva in'engrondaziun dil parcadi per 350 m<sup>2</sup>. En cumparegliaziun cun la varianta minimala dils 3 da mars 2013 – nua ch'ins ei sebasaus sin calculaziuns d'experiencescha – han ins schau offerir las lavurs da catram, aschia ch'ins ha saviu curreger la summa engiuviars. La varianta minimala preveda lavurs d'impressari per migliorar la deflussiun dil plaz, la secunda varianta ensiara ulteriuras lavurs en connex cul baghetg sanitar sco era ils indrezs per la rimnada da rumians. Enconuschentamein vul la Claustra construir ina garascha sutterrana per sia surbaghegiada. Perquei fagess ei senn d'adattar ils baghetgs sanitar al baghetg dalla Claustra.

La part dil parcadi encunter la via cantunala ei cuntenida el project per la sanaziun dalla Via Sursilvana. Quellas adattaziuns ein dil reminent succedidas sin l'entira lunghezia dalla via e buca mo sil tschancun dil parcadi communal. Cunquei ch'igl ei buca previu da midar il project, mobein sulettamein la sanaziun dalla cuvrada fina, ha il cantun negina basa da pretender ina midada dil project sco quei ch'il project dils 3 da mars 2013 prevedeva quei. A vesta dalla situaziun finanziaria dalla vischnaunca ei la realisaziun d'in tancadi electric negina opziun per la suprastonza communal.

### Cussegl da vischnaunca

En cumparegliaziun cul messadi dils 3 da mars 2013 mauncan duas parts essenzialas, numnadamein las installaziuns dil plazzal ed ils honorars. La skizza el messadi preveda ulteriuras plontas, vul quei dir ch'ins stuess lu tigliar si la surfatscha da catram per plantar las plontas?

Pertgei han ins buca priu dapart las differentas posiziuns? Forsa ch'ei dess variantas pli favoreivlas? En quei senn duess ins ponderar da cuntinuar l'auter onn cun la fatschenta.

### Suprastonza communal

Sco menziunau setracta ei cheu da lavurs per gronda part gia offeridas. La lavur da catramar ei cumbinada cun pauca survegionza, aschia che quellas lavurs ein integradas els cuosts da project, cuosts accessoris, nunpreviu e la taglia sin plivaleta. Las installaziuns dil plazzal ein ussa cuntenidas

ell'offerta digl impressari, aschia che quellas ein buca calculadas separadamein. Las treis plontas ein previdas ordeifer il perimeter dil parcadi, aschia ch'ins sto buca tagliar si quella surfatscha. Igl ei era pusseivel che las plontas vegnan postadas in tec auter ch'indica el plan.

Bein havess la suprastonza communal saviu parter si il project e realisar quel en duas etappas en atgna cumpetenzza. En quei cass fuss la suprastonza denton vegnida confruntada cun la renfatscha da tactica da salami.

#### Cussegl da vischnaunca

Ina part dils parcadis ei gia realisada e co ei quella part integrada els cuosts? Pertgei han ins bunamein adattau 1/3 dalla cuvrida en l'adattziun dalla via e buca mo ina part pli graschla?

#### Suprastonza communal

Sco gia menziunau ei la part dil parcadi ch'ei gia vegnida sanada, integrada els cuosts dalla via sco l'entrada dalla Via Sogn Sigisbert. Perquei ch'ins ha stuiu adattar la sbuccada dil parcadi al nivo dalla via e medemamein garantir che la deflussiun dil parcadi funcziuni sin la dretga vart eis ei stau necessari d'adattar ina pli lada surfatscha. Quell'adattaziun vegn dabien alla vischnaunca ed ei cuntenida els cuosts pil project dalla via.

#### Cusseglier Marco Schmed

Ei dil meini che quella fatschenta auda tractada entras la suprastonza communal ni entras il pievel, denton buca entras il cussegl da vischnaunca. La summa da frs. 105'000.-- schai bunamein ella cumpetenzza dalla suprastonza communal e la summa da frs. 192'000.-- ei bunamein da suttametter al referendum facultativ. El propona:

1. Da remetter la fatschenta alla suprastonza communal cun surluvrar il project e liquidar quel en atgna cumpetenzza ni integrar per exempel il tancadi electric, aschia ch'il pievel savess far diever da siu dretg democratic.
2. Risguardar il termin dad in onn naven dils 3 da mars 2013 entochen tier la proxima decisiun en caussa.

Co succedess la damonda da revegnir en cass ch'in referendum vegness en damonda ed il pievel havess da decider davart dil credit?

#### Suprastonza communal

La summa da frs. 192'000.-- ei sedada ord vesta dil fatg ch'ins ha procurau per offertas concretas per singulas lavurs. Senza las offertas havess la summa survargau frs. 200'000.--.

Las prescripziuns digl art. 26 dalla costituziun valan mo per l'istanza che ha giu detg na. En cass ch'ei vegness tier in referendum stuessen duas tiazas dils votants approbar la damonda da credit.

Per ch'ei vegni denton in summa tiel referendum eis ei necessari ch'era il cussegl sappi star davos quella fatschenta.

Il cussegl da vischnaunca sa buca decider davart la proposta da risguardar il termin dad in onn naven dils 3 da mars 2013 entochen tier la proxima decisiun en caussa, perquei che quella decisiun ei giuridicamein buca pusseivla.

**Decisiun**

*Cun 14 encunter 0 vuschs ed 1 abstenziun decida il cussegl da vischnaunca en favur dalla proposta da cusseglier Marco Schmed:*

*Da remetter la fatschenta alla suprastanza communal cun surluvrar il project e liquidar quel en atgna cumpetenzza ni integrar per exempel il tancadi electric, aschia ch'il pievel savess far diever da siu dretg democratic.*

Cussegl da vischnaunca Disentis/Mustér  
Il president: Igl actuar:

Flavio Murer

Ervin Maissen





### Cussegl da vischnaunca 06-2013/2016

Seduta dils 4 d'october 2013

## 3. Regulativ da fatschentas: Cuntinuaziun (messadi nr. 2-2013/2016)

Suprastonza communal

A caschun dalla seduta dils 14 da zercladur 2013 ha il cussegl da vischnaunca decidiu *cun 14 encunter 0 vuschs ed 1 abstenziun d'approbar la revisiun dil regulativ da fatschentas. La tractaziun finala digl art. 24 succeda cun caschun d'ina proxima seduta dil cussegl da vischnaunca, suenter che la situaziun giuridica ei sclarida.*

La constituziun communal preveda buca l'installaziun d'ina cumissiun permanenta da finanzas. Per saver fixar las modalitads d'ina tala cumissiun el regulativ da finanzas basignass ei ina stipulaziun ella constituziun communal, la quala fixass era entras tgi ch'ina tala cumissiun savess vegnir eligida. Giuridicamein eis ei pia buca pusseivel da fixar ina cumissiun permanenta da finanzas el regulativ da fatschentas, sche quei ei buca fixau ella constituziun. Ei dat entginas paucas vischnauncas ch'enconuschan aschibein la cumissiun da gestiun sco era la cumissiun da finanzas. Leu ei quei denton stipulau ella constituziun communal.

Cussegliaer Adrian Pally

"Sebasond sil protocol dalla seduta dils 14 da zercladur 2013 ei il biro dil cussegl, excl. vicepresidente Wendelin Jacomet, che ha fatg part dalla gruppa preparatoria per adattar leschas e reglaments en connex cun las midadas pertuccont l'elecziun dalla cumissiun da gestiun, semess vid la lavur per surluvrar igl art. 24 dil regulativ da fatschentas. Il regulativ da fatschentas ch'ei vegnius approbaus sin l'entschatta d'uost 2013 cun resalva digl art. 53 ch'entra en vigur pér naven digl 1. da schaner 2014.

Duront quella lavur essan nus repassai criticamein igl entir regulativ da fatschentas e fagein aschia la proposta al cussegl da vischnaunca da tractar differents artechels da quei regulativ che duein entrar en vigur naven digl 1. da schaner 2014.

Il biro preveda suandont agir:

1. Il president dil cussegl da vischnaunca lai votar davart la proposta dil biro.
2. Va il cussegl da vischnaunca d'accord cun quei agir, sa la proposta dil biro vegnir repartida.
3. Silsuenter duein ils artechels pertuccai vegnir presentai.

Jeu proponel al cussegl da vischnaunca da s'accordar cun quei agir."

President dil cussegl da vischnaunca

Aschinavon ch'ei dat negina cunterproposta, ei igl agir proponius entras il biro dil cussegl da vischnaunca, approbaus.

*Ils dumbravuschs repartan las propostas dil biro dil cussegl per adattar il regulativ da fatschentas.*

## Suprastonza communal

Igl agir dil biro dil cussegl da vischaunca corrispunda buca allas isonzas parlamentaras. Ins sa secapescha esser da different meini davart il cuntegn d'in regulativ. Denton sto la suprastonza communal saver formar in meini davart las propostas previdas. Quei ei mo pusseivel sche la suprastonza communal vegn informada davart ils texts che duein vegnir tractai entras il cussegl da vischnaunca. Perquei duei la tractaziun da quella fatschenta vegnir spustada per che la suprastonza sappi prender posiziun leutier.

A vesta dalla posiziun ch'il cussegl da vischnaunca ha priu questa sera en connex cul parcadi Claustra, fa ei tuttina surstar co ins vul untgir la decisiun dil pievel pertuccont l'elecziun dalla cumissiun da gestiun entras vuler eleger ina cumissiun permanenta da finanzas.

## Cussegl da vischnaunca

Capescha che la suprastonza communal vul buca prender posiziun questa sera tiel pupi ch'ei vegnius repartius. A nus ei tuts capeivel che nus savein buca eleger ina cumissiun permanenta da finanzas che fuss in ulteriur organ da controlla. Quel'incarica schai tier la cumissiun da gestiun. La cumissiun permanenta ord il miez dil parlament duei predeliberar fatschentas da gronda muntada per buca piarder temps. Quei temps perdin nus sche nies gremi sto mintgamai pér tier la tractaziun dalla fatschenta pertuccada eleger ina cumissiun prearatoria. Denton vesa el era avantatgs en ina cumissiun permanenta che savess era sustener la suprastonza communal tier la tractaziun dallas fatschentas enteifer il cussegl, tonpli suenter quei ch'ils commembers dalla cumissiun da gestiun fan egl avegnir buca part dil cussegl da vischnaunca. La fatschenta duei vegnir remessa per che la suprastonza communal sappi formular sia posiziun. En quei senn duei la discussiun vegnir interrutta per questa sera.

## **Decisiun**

*Cun 12 encunter 0 vuschs e 3 abstenziuns decida il cussegl da vischnaunca da serrar la discussiun.*

En quei senn ei la tractaziun dalla fatschenta spustada sin pli tard.

Cussegl da vischnaunca Dissentis/Mustér  
Il president: Igl actuar:

Flavio Murer

Ervin Maissen



## Cussegl da vischnaunca 06-2013/2016

Seduta dils 4 d'october 2013

---

### 4. Ura da damondas (conform ad art. 44 dil regulativ da fatschentas)

#### 4.1 Cusseglia Rita Huonder-Tenner; ovra electrica Val Acletta

Ella seduta dils 14 da december 2012 ha il cussegl da vischnaunca decidu en connex cun l'ovra electrica Val Acletta sco suonda:

Da cuntinuar cun las retschercas en connex cun l'ovra electrica Val Acletta e quei cun perseguitar plirs models, en emprema lingia en "atgna reschia" ni en collaboraziun cun autras interpresas sil sector d'energia e cun risguardar las Pendicularas Mustér SA.

Con lunsch ein quellas lavurs sesplegadas? Ei il project gia annunziaus pil KEV per ina promoziun federala a favur d'energias regenerablas? Sche gie, san ins sin tgei plaz da spetga che quei project sesanfla?

#### Suprastonza communal

Ins ha elaborau in preproject ch'ei vegnius presentaus als uffecis cantunals involvai, specialmein igl uffeci d'energia, igl uffeci per la protecziun digl ambient, igl uffeci da catscha e pesca ed igl uffeci da construcziun bassa (uals e flums). Il resun ei buca stau negativs, denton spetgan ils uffecis cantunals ulteriuras informaziuns en connex cul project. Actualmein ein ins vidlunder d'elaborar in project da detagl.

L'annunzia pil KEV ei gia succedida pli baul. La vischnaunca ha retschiert ina confirmaziun davart l'annunzia, denton eis ei a vesta dils numerus interessents buca enconuschent sin tgei plaz ch'il project dalla Val Acletta sesanfla.

#### 4.2 Cusseglia Livio Zanetti; survetsch dentari

Ils 9 da november 2012 ha il cussegl da vischnaunca approbau la revisiun dil regulativ davart il survetsch dentari. En quei connex e cun la facturaziun dils quens da dentist e la contribuziun dalla vischnaunca ha el suandonta damonda:

La suprastonza communal duei descriver co il process davart la lavur administrativa en connex cun la facturaziun succeda.

#### Suprastonza communal

Cunquei ch'ei setracta d'ina damonda administrativa, vegn il canzlist communal a rispunder quella damonda.

Tenor il regulativ davart il survetsch dentari da scola surpren la vischnaunca 50% dils cuosts, denton maximalmein frs. 250.-- per affon. La

vischnaunca ha da separticipar vid ils cuosts nets, suenter la deducziun d'eventualas contribuziuns dalla cassa da malsauns.

Tenor dretg cantunal tschenta la dentista il quen alla vischnaunca che tarmetta quel vinavon als geniturs. La vischnaunca ei obligada da pagar il quen alla dentista enteifer 30 dis (incl. ina cumpart dallas deducziuns socialas scoa AVS).

Ils geniturs sclareschan ils detagls cun lur cassas da malsauns. Silsuenter tschentan els la damonda da contribuziun alla vischnaunca cun aschuntar ils mussaments dalla cassa da malsauns (confirmaziun). L'administraziun ha creau per quei intent in formular. Aschinavon ch'ils mussaments ein avon maun sa il pagament succeder al spurtegl. Tgi che giavischa sa denton era tarmetter quels per posta cun indicar il conto sin il qual la contribuziun dalla vischnaunca duei succeder.

Cusseglia Livio Zanetti

Schess ei buca far quella lavur sin ina via pli semplia, aschia ch'il quen vegness tschentaus directamein entras la dentista als geniturs?

Suprastonza communal

La vischnaunca ha gia vuliu sliar quei sin ina moda pli semplia. Il dretg cantunal preveda denton, che la dentista tschenta quen alla vischnaunca e che la vischnaunca ei responsabla pil pagament resp. pigl incasso.

*Ulteriuras damondas*

Cussegl da vischnaunca

En connex cun ina damonda pertuccont il postulat da cusseglier Clemens Berther ei aunc ina risposta davart la suprastonza communal pendent. Plinavon ei aunc pendent la risposta dalla suprastonza communal en connex cun la zona tempo 30. Eis ei en connex cun la tractaziun digl uorden da fatschentas previu da suttametter in niev messadi?

Suprastonza communal

En connex cun la damonda da cusseglier Clemens Berther ein aunc singulas retschercas pendentas. La risposta duei denton succeder sil pli tard entochen la fin digl onn 2013.

Pertuccont zonas tempo 30 els uclauns eis ei previu d'installar ulteriuras tablas d'attenziun specialmein a Segnas. Plinavon vegn suenter che la polizia cantunala ha signalisau siu sustegn, instradau per la part da Buretsch-Segnas la procedura per restrenscher la spertada sin 60 km/h. Ord vesta dalla suprastonza communal fa ei buca senn da sclarir per tut ils uclauns zonas tempo 30. Per quei vegnan ils vischinadis envidai da prender posiziun con lunsch ch'els vesan ina necessitad per ina tala restricziun da traffic. In studi per tut ils uclauns ei tuttina cumbinaus cun cuosts da rodund frs. 12'000.--.

Per la tractaziun digl uorden da fatschentas vegn ei probabelamein buca ad esser necessari da suttametter in niev messadi.

Cumissiu da gestiun

La cumissiu da gestiun ha giavischau sin la fin settember 2013 ina survesta davart ils credits currentes. Quella ei aunc pendent.

President communal

Fa attents sin l'elecziun dalla cumissiun da gestiun il november 2013. Ils vischinadis ein envidai da suttametter ad uras propostas per quellas elecziuns.

President dil cussegl da vischnaunca

Las proximas sedutas dil cussegl da vischnaunca han liug gievgia, ils 7 resp. venderdis, ils 8 da november 2013, mintgamai allas 20<sup>15</sup> uras en casa communal. A vesta dalla tractaziun dil program d'actividad, dil plan d'investiziun sco era dil preventiv eis ei indicau da reservar duas seras per la tractaziun da quellas fatschentas.

Silsuenter fa el aunc attents sin entginas occurrenzas che han liug il proxim temps a Mustér.

Cussegl da vischnaunca Disentis/Mustér  
Il president: Igl actuar:

Flavio Murer

Ervin Maissen

**Disentis/Mustér, ils 15 d'october 2013**

C:\Users\maissen\Documents\Vischnaunca\Cussegl da vischnaunca\cussegl da vischnaunca 2013-2016\Protocols\Cus0016\_06.docx